

Patuh SOP bagi elak penularan COVID-19

Kuala Lumpur: Pihak universiti bersedia mematuhi dan mengikut prosedur operasi standard (SOP) yang ditetapkan kerajaan dalam melaksanakan proses penghantaran pulang pelajar ke kampung masing-masing bermula Isnin lalu bagi memastikan tiada pelajar yang membawa balik virus COVID-19 ke kediaman masing-masing, sekali gus mewujudkan kluster baharu.

Naib Canselor Universiti Putra Malaysia (UPM), Prof Datuk Dr Aini Ideris, berkata keputusan yang dibuat kerajaan itu amat bertepatan dengan hasrat yang dikongsi bersama semua rakyat negara ini untuk memutuskan rantai pandemik COVID-19 serta pada masa yang sama tidak mengabaikan kebijakan pelajar di universiti awam (UA) dan institut pengajian tinggi (IPT).

Beliau berkata, keputusan kerajaan untuk membuka ruang kepada pelajar dihantar pulang ke rumah masing-masing selepas merujuk jumlah pengurangan kes pada minggu pertama Perintah Kawalan Pergerakan (PKP) Fasa Ketiga adalah satu keputusan yang amat tepat dengan mengambil kira

kesan psikologi kepada pelajar, kos makanan serta pengurusan yang universiti perlu tanggung untuk menyediakan keperluan pelajar sepanjang tempoh PKP.

Katanya, pihak universiti sudah menyediakan perancangan untuk menghantar pelajar pulang ke rumah masing-masing secara berperingkat untuk kedua-dua kampus Serdang dan Bintulu sama ada melalui perjalanan darat dengan menggunakan bas universiti serta perjalanan udara dengan semua prosedur ditetapkan oleh Majlis Keselamatan Negara (MKN) akan dipatuhi dan tertakluk kepada aturan rancangan tindakan yang diselaraskan oleh Kementerian Pendidikan Tinggi (KPT).

"Bagi perjalanan darat (Kampus Serdang), universiti akan menghantar pelajar terus sehingga ke rumah masing-masing menggunakan bas dengan jumlah penumpang sebanyak 20 orang setiap bas bagi mematuhi penjarakan sosial manakala bagi perjalanan udara (Kampus Bintulu) pula, pihak universiti akan menguruskan perjalanan udara dari kampus Bintulu ke Semenanjung

dan Sabah.

"Bagi destinasi Kuala Lumpur, pihak universiti juga menguruskan perjalanan darat pelajar ke rumah masing-masing yang berada dalam lingkungan 60 kilometer (km) dari Lapangan Terbang Antarabangsa Kuala Lumpur (KLIA) sebaik sahaja mereka sampai," katanya.

Prof Aini berkata, antara cabaran paling utama dalam menguruskan pelajar sepanjang tempoh PKP adalah untuk memastikan semua pergerakan dan operasi dilaksanakan dengan mematuhi SOP yang ketat, supaya tidak terdapat kecuaian yang akan mendedahkan petugas dan pelajar kepada risiko yang tinggi dijangkiti COVID-19.

"Pada peringkat awal, terdapat sebilangan pelajar yang tidak dapat menyesuaikan diri dalam suasana PKP kerana pergerakan yang sangat terhad dan bekalan makanan berjadual serta asas mewujudkan suasana tidak selesa dalam kalangan pelajar, sekali gus menyebabkan petugas berhadapan situasi yang memerlukan kesabaran tinggi ketika bertugas tetapi melalui penerangan dari se-

masa ke semasa, pelajar akhirnya dapat menyesuaikan diri.

"Saya berharap pelajar terus patuh dan memberikan kerjasama sepenuhnya kepada arahan yang di putuskan oleh kerajaan dari semasa ke semasa, kekal di rumah dan bilik masing-masing sehingga arahan baharu diumumkan oleh kerajaan, sentiasa menjaga kebersihan dan terus fokus serta memberikan komitmen yang tinggi kepada usaha memutuskan rantai COVID-19," katanya.

Sementara itu, Timbalan Naib Canselor (Hal Ehwal Pelajar) Universiti Malaya (UM), Prof Ir Dr Abdul Aziz Abdul Raman, berkata universiti bersedia membantu KPT dan pihak yang berkenaan dalam melaksanakan penghantaran pelajar pulang mengikut SOP yang dibangunkan bersama.

"Sudah semestinya keputusan yang dibuat kerajaan ini mampu mengurangkan kegusaran ibu bapa dan pelajar yang masih tinggal di kampus kerana ibu bapa mengharapkan dapat bersama-sama anak mereka untuk pulang ke kampung dalam keadaan selamat dengan UM sentiasa memberi perhatian kepada kebijakan pelajar terutama yang memerlukan rawatan kesihatan," katanya.



Prof Datuk Dr Aini Ideris



Prof Ir Dr Abdul Aziz Abdul Raman